

COLUMNNA

Should I Stay or Should I Go?

DAVID TRUTTMANN/FMR

Tschel di èsi capità. Sco in chametg m'èsi ì tras il chau: in patratg, in giavisch, in desideri, sur dal qual jau na ristg bunamain betg da scriver. Ma ussa stoi vegnir scrit: Per in milliavel secunda hai jau giavischà enavos il lockdown! So, ussa èsi ora ...

Quant avevan nus bramà enavos la normalità, la cuminanza, la vita normala, il mintgadi, il trot, ils inscuters suenter la pandemia. Cler, quella pandemia n'è bain betg finida per dal bun. Il virus vegn puspè pli viv ed activ. Però nus essan libers da tut las restricziuns, da mascrinas e tests e distanzas socialas. Ed ussa?

Ussa sun jau surdumandà e stuffientà. Igl è simplamain memia bler: memia blera gliעד, memia bleras exposiziuns, memia blers concerts, memia blers referats, memia bleras conferenzas da medias (per schurnalists/as), memia bleras dietas, colloquis, radunanzas communalas, radunanzas generalas, festivals, openairs, brunchs, grilladas, turniers, cursas, happenings e häpplis, aperos e tut il dianzer.



Cler, il mais da zercladur è per regla chargià cun occurrenz, però quai che schabegia per il moment è ina veritabla «explosiun». Quel pled marzial da la «explosiun» n'è en cas betg da mai, mabain quel citesch jau dad ina persuna activa en il sectur da cultura en Engiadina. Ella s'engascha cun fiευ e flomma per sia instituziun, però ella vesa che sia gliעד, ses public, na sa per il moment betg sa decider nua ir e nua star. Ed ella ha tema che er sia bella occurrenza da questa fin d'emna pudess vegnir a la curta. Ditg simpel e setg: igl è simplamain memia bler. Ed er jau pens «Should I Stay or Should I Go» tenor il hit da The Clash. La pande-

mia aveva respundi per in tempet quella dumonda, aveva surpiglià la responsabladad per quella decisiun. Quai era atgnamain detg cumadaivel.

Cler, suenter il chametg ch'è ì tras mia testa – da giavischar enavos il lockdown – hai jau gì in pau in curius sentiment, nauscha conscienza. Vai anc da giavischar enavos il lockdown! Ed in summa, è mes desideri in problem extern u intern? Vul dir, sun jau vegnì in curius durant il temp da la distanza sociala u è il mund exteriur vegnì ord clocca cun tut sia truscha? – Per amur da mia psicoigiena sun jau sa chapescha vegnì a la conclusiun ch'i saja il segund: il mund ordaifer è vegnì in «mund sutsu».

Perquai hai jau decis l'auter di tut frestg e franc: Jau stun oz a chasa. Atgnamain m'era adina gia pli simpatica – er en outras occasiuns – l'emprima part da la dumonda da The Clash.

David Truttmann da Münstair/Cuira è schefredactor da la FMR Fundaziun Medias Rumantschas.